

欽定剿平粵匪方略

欽定剿平粵匪方略卷一百八 甲寅年

十月初五日庚子陳啟邁奏言九江逆船陸續駛

往下游武甯境內賊匪愈聚愈多屢擾義甯邊

界臣飭各軍馳往武甯會剿八月三十日武甯

匪徒及湖北新到之賊竄踞附近三都梁口官

山燕子山等處經都司馬占魁督同千總羅玉

祥等帶領兵勇及各紳士團丁前往堵剿連施

槍礮轟斃賊匪三百餘人該匪潰敗退往清江  
地方屯踞九月初一日馬占魁等追至清江該  
匪全股盡潰兵勇乘勝追逐趕偏落河者甚多  
又八月三十日武邑木高地方有逆匪千餘名  
撲犯船頭灘經把總楊錦春等統帶練勇鄉團  
追剿立將賊巢燒燬餘匪退踞月田等處吳錫  
光卽帶靖勇及義武兩處鄉團自梁口迅赴武

甯惲光宸帶領革員程元瑞等自建昌飭催各路兵勇前進初六日行抵武甯縣之月田地方係該逆久踞巢穴吳錫光督率兵勇五路齊進陣斃賊目多名賊遂大敗狂奔窮追十餘里殺賊一千餘名敗殘匪衆均竄回興國州地面武甯城圍頓解惲光宸等一俟籌防周妥卽往九江攻勦

陳啟邁又奏言據探報湖口彭澤江岸泊有賊船數百隻揚言約會九江逆黨分路內竄有匪船七十餘隻駛至星子縣屬之神靈湖一帶擄掠經該署南康府知府王楷等督率兵勇並團練首事生員鄂拱垣等帶領壯丁往勦擊斃賊匪二十餘人擊沈賊船五十九隻奪獲七隻其餘匪船均逃竄出湖奏入

上命軍機大臣傳諭陳啟邁曰曾國藩與塔齊布等分兵三路直擣下游計黃州以下賊匪勢必竄入江境武甯雖已解圍其鄰楚水陸各境深防潰匪奔突且據該撫片奏星子縣屬神靈湖地方追勦匪船餘匪逃竄出湖尤恐楚匪大股衝入陸路則勾結義武餘黨經由修河水路則徑達九江湖口皆可入湖一經蟻聚勢更不可收拾惟有豫籌迎擊將義武各處嚴

密布置後卽令惲光宸督率吳錫光趕緊帶同兵勇  
馳往九江調集礮船一面由水路會合楚北之師沿  
江勦捕一面督催陸兵環攻九江郡城迅圖克復時  
時與曾國藩等知會籌商萬勿株待楚軍轉致遲誤

初六日 辛丑 向榮奏言查賊鋒兩座竄泊金山四

面皆有賊划巡哨九月十五日經余萬清派令  
千總田宗揚帶領兵勇前赴高資港出江往襲

檄會勇練民團埋伏香山二擺渡等處接應一面出隊分布鎮城各門以截該逆出援之路一面密約周士法等艇船乘機過江夾剿田宗揚率領兵勇船隻潛至箴上施放火箭火罐立時火起該逆不知兵從何來一面冒火開礮一面奔避箴旁哨船紛紛擁擠落水我船又分投縱火延燒大糧船兩隻小船三隻焚斃賊匪並撲



江者不下一百餘人時有瓜州賊划二十餘隻  
飛駕來援各兵勇奮勇迎勦復焚燒逆船二隻  
各划亦均被擊敗上游又有木簰一座由中流  
放礮衝下我軍恐腹背受敵且因風力漸細師  
船未能來助收入二擺渡撤隊而回其時鎮城  
遙見木簰火起該逆卽由西門出賊一股當經  
在彼埋伏之潮勇迎頭攔勦立斬六七十人餘

卽敗退入城十六十七兩日復約會江北大營  
同時進攻瓜鎮余萬清親督兵勇四面攻擊逆  
賊堅壁不出所有八卦洲淺閣木簔一座自將  
賊船擊回不敢復來援應六合水勇管駕師船  
各快艇並該縣划船自北岸上流潛行駛撲賊  
簔各師船亦分兩翼偪攻施放噴筒火箭賊簔  
上木城摧卸木簔亦卽漂散逆衆慌亂撲水焚

溺者頗多並將岸邊蘆葦縱火焚燒絕其竄陸  
之路統計箚內賊黨不下三四百名焚溺擊殺  
無一得脫者其金陵上方橋各賊營自我兵攻  
徧南門後聚黨愈多防守愈密臣飭令七橋壘  
上方橋各營盤豎立投誠免死紅旗招降每日  
投出脅從或數十人或十餘人不等訊明後皆  
分別省釋免死酌給衣食並令其營前薙髮以

招餘黨其金山賊簿亦恐下竄江陰通州等處  
並飛咨托明阿及責成焦山水營周士法孫雲  
鴻等嚴加攔堵不准稍涉疏虞奏入報

同日勝保奏言臣於八月二十四日親督兵勇  
攻賊西南令兵勇各擁攔牌前進賊於城上密  
放槍礮幸攔牌排齊兵勇有所遮護受傷尙少

膽氣頗壯意欲於此處開空地道通至城根臣  
以距城太遠非竭數晝夜之力不能成功隨令  
撤回定於二十五日在東北面進攻時用大礮  
轟擊賊匪不敢出拒當令各兵勇齊隊前進臣  
親往示以地段分兩路開掘地道以破賊濠復  
於兩路之中新築礮臺之前添修營牆一道牆  
內安設木板填砌土仍照前此修築馬道寬

九尺高丈餘此法能立身於不敗之地功雖略  
緩而人免受傷且得尺則尺得寸則寸總可直  
達城垣乃該逆乘我興作之際屢次糾黨衝出  
俱經我兵擊退傷斃不少自二十五日至今已  
數晝夜更番未撤隊伍時時進攻苦於賊不出  
戰專在死守其狡猾難破之勢我兵幾於無計  
不施而賊之抵死相拒詭詐百出臣焦灼萬分

不得不堅忍熟籌以期節節攻進奏入

上命軍機大臣傳諭勝保曰該大臣攻剿高唐業經數月自應胸有成算乃自謂移攻西南或可得手旋又在東北面進攻游移兩可毫無定見卽以進攻東北而論亦祇用礮轟擊而已數月以來所籌辦者皆毫無成效不過每閱數日敷衍入奏以爲搪塞地步似此庸懦無能殊堪痛恨逆匪在高唐城內出入自由

並無阻隔其擄掠米糧招集黨與爲勢所必至我兵曠日持久師老力疲而賊勢未衰勦辦何能藏事該大臣不思斷其接濟併力進攻惟以賊詭詐不出飾詞入告貽誤之罪豈能屢邀寬典勝保接奉此旨後若再不知奮勉朕惟執法從事決不寬貸

初九日甲辰僧格林沁西凌阿奏言逆匪屢次受

創心膽益寒九月二十四五等日疊出窺伺均



經我軍擊退二十七日該逆分水旱兩隊出巢  
其旱路賊匪向臣僧格林沁及總兵經文岱營  
牆交界處撲來因離濠較遠我兵未開槍礮該  
逆亦未敢撲近其水路賊匪乘駕大船五隻小  
船十餘隻向穆輅營牆奔撲是時夜黑如墨藉  
有水光可以看視我兵擎槍以待該逆先用大  
船一隻駛近營牆被水內木椿所阻該逆卽將

長梯搭於濠上先將梯上火彈引燃一片火光  
逆眾隨卽一擁而上經營總富泰指揮官兵開  
放槍礮奮力攻擊賊匪紛紛落水船上之賊不  
能續登倚恃攔牌遮身藏匿不出我兵開放槍  
礮擊打無不穿透其餘大小船隻爭向濠牆開  
礮經穆輅西凌阿珠勒亨各帶官兵開放大礮  
該逆傷斃及投水者不計其數二十九日由河

西連鎮擁出賊匪多名捨命攻撲瑞麟營盤瑞麟督飭官兵開放槍礮拋擲噴筒火彈該匪抵死抗拒臣僧格林沁與瑞麟當飭開放大礮從旁橫擊侍郎伊勒東阿擊其後隊三面齊攻斃賊無算該逆力不能支踉蹌敗退十月初五日東西連鎮突出賊匪千有餘名分路來撲總兵桂齡調集官兵鎮靜以待該逆離濠數武桂齡

指揮官兵一齊開放槍礮賊匪紛紛倒地我兵  
勇氣百倍奮力攻擊旋有賊匪跪地乞降桂齡  
察知其詐仍施放連環槍礮該逆始行敗退回  
巢奪獲旗幟器械多件是夜陰雲密布該逆分  
兩股出巢一股向正北一股向正南蠡擁而來  
均經官軍擊敗回巢惟該逆窮蹙已極詭謀愈  
多現在嚴守濠牆俟該逆切近開礮迎擊以期

得手奏八

命軍機大臣傳諭僧格林沁西凌阿曰逆賊占踞連  
續數月之久疊經嚴旨催勦總未悉力進攻此次僧  
格林沁奏報雖據稱連獲勝仗仍係待賊攻撲出巢  
始行轟擊我兵並未離營一步實所不解該逆米糧  
漸絕前據僧格林沁言之鑿鑿茲閱所稱撲擾情形  
逆賊飢餓之餘尙能如此兇橫豈非該大臣爲人

所愚遽以入告耶此時河冰凍合所築濠隄斷不足恃且以因爲勦總須餉糈充足方爲可恃現在我軍既有凍餒之虞若再不速籌勦滅是賊未困而我軍先困何時始能蕺事事勢至此斷難再緩著僧格林沁等迅速設法四面併力進攻萬不准再延時日若復以損折官兵於事無濟等語巧爲搪塞是該大臣等有意遷延聽賊他竄貽誤之罪豈能屢宥儻各路

帶兵大員不知奮勉卽著該大臣嚴叅治罪

同日向榮奏言九月二十五日逆股二千數百人由觀音門衝出直撲棲霞一帶當派總兵德安帶兵追勦二十六日至橋頭地方該逆分三股迎拒德安督同守備李定太等三路兜圍擊斃賊匪無算至高資汛過河追擊該逆拌死迎拒守備李定太等帶勇突入賊隊適遇騎馬賊

目楊政潮率黨力拒被藍翎兵丁張得祿槍擊落馬斬取首級我兵擁上連砍牌刀手四十餘人都司蔣錫光等各帶兵分路抄截斃斬百數十名該逆大股逃至馬步橋地面先是余萬清派令候選道劉廷鏌帶勇一千名及遊擊饒永福等帶兵五百名赴高資迎勦並派千總田宗揚從九品卞乃謨等管帶兵勇埋伏永豐橋截



擊兼防金山木鐸之賊前來援應一面飭令各營隊伍分門堵紮以截鎮賊出城接應及該逆由馬步橋翻山竄越其時劉廷鎮潮勇已由二十里鋪抄來迎擊立斃執旗賊目數名該逆遂分二股爭前衝突各勇兩面力堵復生擒賊匪七名斬首三十餘級適饒永福等亦由洪汛鋪馳至會勦該逆四散奔逃我兵分路跟擊俘斬

益多逆衆拋棄槍礮器械羸馬而走約有三四  
百人直由江邊竄至新開河渡口田宗揚卞乃  
譔率勇迎截擊斃黃衣賊目二名斬首二十餘  
級生擒七十餘人朱景山銳勇亦馳至夾攻又  
殲騎馬賊一名我軍乘勝痛勦逆衆撲入夾江  
其時德安大兵已將馬步橋賊匪後隊追下會  
同鎮營各軍合圍勦洗餘黨全潰余萬清又添

派遊擊米興朝等前來協助並會合勇練鄉團  
追捕俘馘甚多二十七日德安復督令各兵勇  
搜山又擒斬一百餘人將逆匪全股剿除淨盡  
當二十六日余萬清派隊之後親督各軍分門  
堵紮以截鎮賊出城接應該逆果於東南北三  
門各出賊千餘撲來經我軍三面伏兵並起斃  
賊前隊十數人余萬清督令各兵勇分左右抄

攻擊倒馬上一賊乘勢追壓斬首十餘級傷斃  
多賊該逆又由北固山江邊抄出數百人適槩  
船已駛過江邊開礮轟擊又斃一百餘名該逆  
敗入城內至金山賊箠於二十七日突出千餘  
人適被劉廷鎮帶勇截住殲賊多名周兆熊梁  
成桂亦帶兵勇由七里港抄出合剿該逆亂竄  
擁擠落水餘匪敗回正擬收隊金山賊箠復竄

出六七百人適兵勇搜山回隊當卽分投馳勦  
殲賊五十餘名時瓜州賊船又由鮎魚套上岸  
來助勇目謝錫九衝過賊中短刀相接砍倒黃  
衣賊目一名斬馘多名生擒四賊該逆大夥敗  
竄我軍過河追殺數十人餘匪已逃轉金山臣  
仍責令余萬清乘勝力圖克復以勦爲防卽將  
德安一軍撤回大營調遣日來又有賊出南路

殷巷一帶該處近接秣陵關尤爲入蘇衝要現  
已馳兵前往剿辦余萬清督兵鎮江大小百餘  
戰殺賊實已不少此次派兵截剿尤爲得手又  
連日接仗獲勝兵勇併力齊心似宜量子鼓勵  
奏入

上命軍機大臣傳諭向榮怡良曰此股金陵分出之匪  
經官兵卽時追殺悉數掃除不得與鎮江之匪會合

但該逆窺伺蘇常蓄謀已久余萬清將鎮城與金山  
木鐸之賊連日攻擊均獲大勝該逆窮極思竄更屬  
可虞向榮當乘勝併力攻取金陵仍嚴絕該逆分竄  
之路所有趕赴句容防剿之游兵是否足敷堵禦不  
可以此次竄匪剿除殆盡不慮該逆故智復萌也怡  
良近駐常州尤應設法嚴防該郡所練之勇足恃與  
否界連鎮江之處如何扼守剿賊重任雖專責之向

榮而該督職守封圻尤不可令奔潰餘匪突入無事之境致遭蹂躪向榮一面督兵剋期收復金陵一面與怡良力籌大局設法堵截俾該逆無可旁竄毋稍大意余萬清現已加恩免其前罪仍著該大臣責令迅速圖功儻不能將鎮江趕緊克復甚至老師糜餉貽誤事機卽著從嚴叅奏

諭內閣曰此次逆匪分黨應援鎮江之賊經大兵追



捕全數勦除鎮江及金山之賊又經官軍痛勦連勝  
是兩城賊匪不能互相救援計窮思竄正當嚴密圍  
勦迅圖攻克向榮卽統領各軍力籌收復金陵責令  
余萬清克復鎮江毋再遷延余萬清本係帶罪效力  
之員自到鎮江督兵以來尙知愧奮所有原定罪名  
著加恩寬免以觀後效兵丁張得祿著以把總拔補  
在事出力員弁兵勇著該大臣擇尤保奏

同日曾國藩塔齊布奏言 臣塔齊布率湖南將  
弁於九月十三日在鄂省拔營由武昌進勦大  
冶之賊署湖北提督佈克慎副將王國才遊擊  
阿達春從之以行候選道羅澤南亦於十三日  
拔營由金牛堡分勦興國州之賊遊擊彭三元  
都司普承堯等從之以行陸路之師副都統魁  
玉總兵楊昌泗等於十七日拔營固原提督 臣

桂明已自楊店先至黃州水師前幫於初七日  
起碇二幫於十三日起碇臣國藩於二十一日  
再次黃州與北軍一會卽飭魁玉楊昌泗於二  
十二日西出蘄水進剿蘄州之賊二十日羅澤  
南等馳抵興國之鹽埠頭該逆分三路來撲羅  
澤南彭三元由田隴中路進攻普承堯由傍山  
左路進李續賓由沿河右路進四面圍抄殲其

前鋒數人賊遂奔潰薙髮逃生者十之四五餘  
多回竄興國州二十一日羅澤南等派隊六成  
仍分三路前進直薄州城由南門入搜獲僞知  
州胡萬智凌遲梟示復捕獲餘匪二十餘名就  
地正法該知州保忠亦帶近鄉練勇回城會同  
安撫難民其大冶之賊臣塔齊布於二十日由  
武昌縣拔營馳勦二十一日抵大冶城外該逆

整隊來犯臣塔齊布率兵由中路進王國才帶兵由南路進佈克慎等帶兵在北路埋伏鏖戰逾時賊衆大潰我兵由縣城北關追出南關斃賊約一千餘名餘賊爭橋過河橋斷爲追兵所偪落水溺斃又千餘名各營生擒逆匪一百三十四名興國大冶兩城同時克復各營水師分紮蘄州上游之赫花壕道士袱渭源口一帶十

八日探聞賊黨窺我水軍深入希圖抵隙來撲  
楊載福彭玉麟等於十九日督同千總秦國祿  
等各帶長龍三板自蒜花壕出隊行抵蘄州對  
岸賊船開出百餘號放礮迎敵我軍奮勇轟擊  
逆勢不支卽行下竄我軍分戰船一半追赴下  
游趨至距田鎮十五里之骨牌磯先後燒燬賊  
船三十餘號轟斃賊匪無數其一半則攻擊未

開之賊船六十餘號一概燒盡羣斃逆黨甚衆  
北岸陸軍未到州城未能卽復收隊回營該逆  
畏南軍之勁已從下游渡竄北岸於田家鎮多  
築土城掘濠數重又以木箒橫截江面阻我舟  
師分賊數千踞守蘄州城內亦於臨江一面築  
壘安礮拒禦水師臣塔齊布督同羅澤南尙在  
南路搜捕餘匪臣國藩現紮道士沱相機審度

如果北岸之賊負隅抗拒仍當令南軍渡江會  
勦以期一鼓殲除

曾國藩又奏言探報該逆於田家鎮江面橫安  
鐵鎖二道相距約十數丈鐵鎖之下排列小划  
數十隻以槍礮護之北岸築土城多安礮位專  
防我軍戰船該逆屢次大敗尙兇橫如此殊堪  
痛恨臣等擬先攻田鎮對岸之半壁山奪其要



集賢堂  
卷之二  
隘則鐵鎖一岸無根當易拔去奏入

上命軍機大臣傳諭曾國藩塔齊布曰此次連克興國  
大冶兩城南岸賊巢已破而蘄州賊勢尙衆水師旣  
經攻勦得手何以桂明等陸路一軍未能趕到南軍  
攻偏緊急則該逆必伺隙北竄朕早慮及此今覽所  
奏各情適與朕前旨相符曾國藩經朕畀以勦賊重  
任事權不可不專自桂明以下文武各員均歸節制

傷有不遵調遣或遷延畏葸貽誤事機者卽著該侍郎專銜叅奏以肅戎行該逆現於田家鎮築城窆濠並於蘄州城外築壘安礮顯係意圖久踞此時進剿之計自屬北重於南該侍郎等擬令南軍渡江會剿並籌攻田鎮對岸之半壁山設法毀賊鐵鎖卽著相機速辦仍嚴檄催提北路官兵協同圍剿一俟蘄州收復應如何分兵南下直擣九江安慶並著隨時體

纂言集卷之三  
察情形統籌辦理以副委任

上諭內閣曰此次陸軍分途進剿同日克復興國大冶  
兩城水師亦大獲勝仗卽著曾國藩塔齊布乘勢激  
勵各路兵勇沿江夾擊以次殲除餘黨迅靖妖氛所  
有在事出力員弁兵勇並著准其擇尤保奏

欽定勦平粵匪方略卷一百九 甲寅年

十月初十日 乙巳 托明阿陳金綬雷以誠奏言九

月十六十七等日金陵下關駛出賊船數十隻  
遊擊葉常春等會同副將李德麟周希濂及向  
榮所派之副將蔡應龍分幫截勦將賊船擊沈  
多隻復與署六合縣溫紹原商議密備火攻子  
母柴船裝載火藥於十七日夜間潛襲賊船各

師船分兩翼圍攻施放大礮並擲放火罐火箭  
頃刻延燒兵勇冒煙躍上賊箴殲戮無算餘賊  
紛紛溺斃其梟水奔上南岸之賊復被兵勇追  
殺多名木箴解散隨流漂蕩臣等以八卦洲賊  
箴旣燬則鎮江之賊箴正可一律剿除且聞金  
陵下關尙有賊箴七隻尤須防其下駛連日咨  
商余萬清南北兩岸同時進攻瓜鎮並飭水師

南北策應兼剿賊鋒以牽賊勢十月初一日臣  
托明阿復同慧成親督德興阿等由三汊河岸  
分路進兵賊從土城內擁出數百人遊擊張維  
義馬永泰等帶兵迎擊賊皆遁入土城臣陳金  
綬會同雷以誠等仍由三汊河東岸及虹橋分  
路進剿直抵賊營該逆僅出數十人隔濠拒戰  
經官兵開放槍礮逆匪旋即遁回初二初三等

日屢次進勦均有斬擒至焦山水營地處瓜鎮  
下游孫雲鴻等督率遊擊張攀龍葉常春管帶  
師船分爲兩隊一由南岸先攻鎮江北門甘露  
寺一則徑由中流直逼七號口並用大礮攻塌  
北固山迤西賊臺一半魯肅墳山上賊屋數間  
兼擊塌賊隄數處現定按日進攻與陸路互相  
接應臣等惟有竭盡血誠南北齊心同時並舉

力勦上游水陸應援之賊一面攻克瓜鎮一面  
燬賊木簔又浦口洲地賊營及鐵鎖攔江之賊  
船壘催武慶李德麟會同吳全美葉常春等紅  
單拖罾各項戰船暨浦口六合水陸兵勇併力  
勦除奏入

上命軍機大臣傳諭托明阿陳金綬雷以誠曰金陵賊  
黨復連造木簔接續東下昨已諭令向榮等扼其分



竄之路惟向榮兵力僅能截其陸路而鎮江前此竄  
泊之賊簿尙在卽九洲洲賊營及鐵鎖攔江之賊船  
亦未勦除終無了局著托明阿等趕緊督率水陸將  
弁克復瓜州勿再遷延其浦口洲地賊營並著嚴飭  
武慶等併力攻勦托明阿等與向榮雖各統一軍仍  
當聯絡一氣互相策應此次擊焚船簿之水營將備  
等登岸協勦尙屬奮勇著卽酌保數員以示獎勵

同日和春福濟奏言廬城賊匪被勦計窮一味  
堅守九月十八日五鼓臣等督率吉順嵩瑞等  
帶領官兵潛伏而進攻至午刻得勝門突出賊  
匪千餘人經常清江忠濬程智泉帶領兵勇直  
前擊勦立斃多名賊勢大潰飛奔入城二十五  
日珠克登帶領官兵並知會常清等飛飭楚廣  
各勇在得勝門外一帶駐紮該逆正在挖築土

集賢堂明卷一百六  
壘我軍兩面夾擊該逆紛紛敗逃得勝門突出  
賊匪千餘人意在救護經程智泉江忠濬等帶  
勇盡力攻擊旋拔去木椿立將所築土壘平毀  
二十八日賊匪在濠邊栽置梅花椿經珠克登  
督率官兵擊斃賊不計其數隨將梅花椿拔  
去奏入

上命軍機大臣傳諭和春福濟袁甲三曰該提督等圍

剿廬州賊匪將及一年總未能出奇制勝立破賊巢  
貽誤遷延罪將誰諉著卽迅籌進剿之策督飭將弁  
克復堅城一面嚴催秦定三忠泰等速將舒城等處  
賊匪埽除淨盡毋再遲延干咎湖北興國大冶已經  
收復曾國藩等水陸各軍指日東下應如何聯絡接  
應之處並著統籌兼計以期會合夾擊速清醜類  
和春福濟又奏旨廬江自克復以後賊匪復由

無爲巢湖等處窺伺竟敢屯聚攻圍縣城甫經  
收復練勇無多守禦倍形竭蹶臣等前飭道員  
何桂珍帶領開化等處勇五百名馳赴廬江安  
撫防禦雖據該道稟稱已令州判蔡鏐等帶勇  
四百名馳抵廬江救援而該道帶兵起程多日  
尙未據報到廬難保非有心逗留應請

旨將何桂珍先行交部議處奏入

上諭內閣曰何桂珍著先行交部議處如查有畏葸遷延情事卽著嚴叅懲辦

十一日丙午曾國藩奏言臣自入鄂以來據官吏

將弁紳庶僉稱武漢再陷之由實因崇綸台湧多方貽誤百姓恨之刺骨而極稱前督臣吳文鎔忠勤憂

國殉難甚烈官民至今思之蓋緣吳文鎔於上年

九月十五到鄂接印之日卽值田家鎮兵敗闔  
城逃徙一空官弁蒼黃無計吳文鎔傳集僚屬  
誓以死守卽日移居保安門城樓隨身僅一僕  
一馬無書吏幕賓無親兵夫役晝夜手治文卷  
衣不解帶者兩月由是人心稍定潰兵稍集賊  
匪仍退下游不敢徑犯鄂垣乃崇綸輒劾奏吳  
文鎔安坐衙齋閉城株守其實該前督日夜在

宿城樓並未在署少住片刻也賊匪所恃以駭  
人者全憑船隻之多官軍若無舟師雖有陸兵  
數萬亦熟視而無可如何自上年田鎮失防以  
後吳文鎔江忠源二人與臣往來書函皆以籌  
辦水師爲第一要務臣在衡州試造戰船吳文  
鎔屢函熟商造船配礮選將習戰之法臣歎以  
爲不可及其言湖北現僅雇小划擺江之類不



堪戰陣必待臣處舟師辦就駛至鄂中始克會  
同進剿亦係實在情形乃崇綸茫然不察動云  
船礮已齊譏督臣畏葸不出吳文鎔素性剛介  
深以畏葸爲恥遂發憤出征以屢潰雜收之兵  
勇新募未習之小划半月不給之餉項倥傯赴  
敵又居者與出者不和事事掣肘遂使堵城之  
役全軍潰敗湖北府縣相繼淪陷蓋未始非崇

綸叅劾傾陷有以致之也尤可異者當叅劾之後吳文鎔毅然出征崇綸復率僚屬力阻其行我

皇上曾嚴飭其自相矛盾迫堵城旣敗吳文鎔殉難闔省軍民人人皆知而崇綸以不知下落入奏不惟排擠於生前更復中傷於死後正月十九日崇綸遣守備熊正喜至衡州一帶催臣赴鄂救

援僞造吳文鎔咨文借用布政司印信咨內但  
稱黃州賊勢猖獗並不言堵城已敗督臣已死  
種種詐僞故作疑似之詞無非謂吳文鎔未能  
殉難誣人大節始終妒害誠不知其是何肺腸  
吳文鎔旣歿青麀幫辦軍務崇綸又與之百端  
齟齬求弁兵以護衛而不與請銀兩以製械而  
不與或軍務不使聞知或累旬不相往還青麀

在長沙時與臣言及崇綸之多方掣肘台湧之坐視不救輒爲痛恨怒眦欲裂上年張亮基欲以全力堵田家鎮崇綸旣阻撓而不合繼又傾擠吳文鎔旋又忌害青麀皆使銜恨於地下平心而論鄂省前後潰敗決裂之由不能不太息痛恨於崇綸也自賊踞漢陽漢口爲老巢由是西至宜昌北至德安南犯湘省三次攻陷岳常

澧州縱橫百餘州縣蹂躪殆徧廬舍蕩然崇綸  
閉坐一城若罔聞知土匪擄掠亦置不問所失  
國家土地並不一一詳奏百姓之言皆曰青巡撫  
在此尙有兵勇驅賊之擄掠尙有告示憐民之  
疾苦崇巡撫並告示而無之我

皇上優容臣下僅予革職崇綸稍有天良亦當以一死  
圖報及六月初二日武昌城陷隨衆軍逃出輾

轉偷生反稱革職回京已於前一日先出鄂城  
呈請轉奏身爲封疆大臣無論在官去官死難  
是其本分卽不死亦不妨明言似此倒填月日  
諱其城破逃生之罪劾人則雖死而猶誣之處  
已則苟活而故諱之豈非無恥之尤者哉臣自  
入湖北境以來目擊瘡痍博訪輿論莫不歸罪  
於崇綸以年餘之成敗始末關繫東南大局不

敢不據實縷陳其應如何聲罪嚴究

聖主自有權衡非臣所敢擬議

同日正白旗滿洲都統薩迎阿副都統玉明基溥奏言遵查已革湖北巡撫崇綸曾否到京據該旗參領文廉署佐領雲騎尉景豐等結稱據崇綸之胞弟筆帖式崇縉稟稱接到崇綸來信云於五月二十八日接奉革職

諭旨六月初一日起行因路梗繞赴荊州患病未愈復  
由荊州赴陝西就醫至陝又患瘡疾一俟稍痊  
卽行回京臣等復將崇縉傳到面詢與該參領  
佐領所稟無異均奏入

上諭內閣曰崇綸經朕簡任湖北巡撫上年賊擾田鎮  
不能與前任總督吳文鎔共籌戰守丁憂後留辦防  
剿復與巡撫青麐不能和衷協力共保省城經朕革



職示懲宜如何愧奮圖報乃當武昌失守輒卽逃往  
荊州偷生避難實屬昧良負恩茲據該旗查明該革  
員現在陝西就醫著王慶雲派員押解來京交刑部  
候旨訊辦

十二日  
丁未楊需奏言下游追剿賊匪疊獲勝仗

收復大冶興國兩城其崇陽縣前經克復忽有  
賊匪由通山竄至復行失陷臬司胡林翼署蒲

圻縣孫守信帶勇往剿該匪等復竄往通山胡  
林翼窮追截剿徧搜山谷斬殺甚多餘俱散竄  
崇陽民風惡劣匪類至多胡林翼帶勇暫駐督  
率城鄉紳士嚴行保甲趕辦團練責令將從前  
莠民執送悉予駢誅隱匿者查出連坐團練不  
力者罪之業已辦有端緒可冀肅清臣已遴員  
馳赴通城通山崇陽興國等處署理妥爲安輯

撫綏奏八報

十四日己酉向榮奏言十月初二日金陵賊匪三

千餘人由南路竄擾殷巷馬木橋一帶臣派副

將張國樑等帶領兵勇馳往截勦我兵趕至該

逆已竄抵秣陵關餘仍竄回南門張國樑等兵

繞道徑趨殷巷轉落賊後當經加撥勁兵一千

名星夜馳往並飛檄鄧紹良分兵六百名由小  
丹陽前來會剿張國樑等馳至秣陵關後分三  
路進兵該逆排隊出敵我軍用連環槍礮攻擊  
立斃賊匪數十名後隊分兩翼抄近關前用擡  
槍先將該逆大黃旗擊倒各兵勇乘勢殺上賊  
衆敗入關內張國樑卽從街頭奮勇躍上房屋  
兵勇繼登拋擲火罐噴筒燒斃賊匪無數該逆

見我兵已入關內前隊驚潰相率由北關口衝出先經王浚督領兵勇在關外廟牆埋伏抄截立時斬馘一百有奇張國樑率同五品頂戴李振甲把總曾魁等分投追殺復殲賊三百五六十名生擒二百餘名最後竄出之賊經我軍四面圍剿紛紛撲入塘水擊殺甚多餘黨正圖外竄適王浚等破柵殺入短兵巷戰連砍黃衣賊

多名張國樑又率勇燒擊該逆乃由六家橋竄出各兵勇跟蹤追斬又斃一百餘名生擒四十餘人撲水淹溺不計其數其逃逸過橋之賊均被後隊兵勇截殺無一得脫者並將竄伏關內房屋餘匪搜捕淨盡放出擄脅難民四百三十餘人統計殺斃賊匪八百餘名割獲首級耳辮三百三十四件生擒二百六十八名焚溺者無

算訊問生擒之賊內有僞總制盧得汰僞百長黃義瞬僞司馬張公惠三名供稱此股賊首係僞國宗章潰詳僞提督石明開僞承喧許茂林僞指揮曾孟漳四人皆廣西老賊章潰詳先已被槍擊斃石許曾三賊均被亂兵殺死並有欲占踞秣陵關紮營以圖窺擾東南並擄多人入城等語餘亦供認賊黨不諱當卽分別正法

民以食为天



下竄仍催吳全美等趕緊帶船迎勦以清江面而扼上游奏八報

十五日

庚戌

陳啟邁奏言現據探報湖南水陸各

軍已抵湖北省城卽經飛飭總兵趙如勝等將

戰船子母船飛駛出湖會同截勦旋准前禮部

侍郎臣曾國藩咨武昌漢陽均已克復擬卽乘

勝窮追埽清江面江省嚴船應堵截湖口豫備  
會合攻剿直擣下游又經轉行遵照並派通判  
程迪昌等帶勇四百名由陸路馳赴湖口以爲  
水軍聲援據趙如勝等稟稱本月十九日起程  
前往下游相機堵截至建昌德安股匪已次第  
殲滅武甯匪徒亦經官兵痛剿先後斬擒三千  
餘名敗匪竄回興國州境內武邑橫路一帶與

興通毗連處所經已革守備吳錫光帶勇千餘  
名前往搜捕餘匪安撫居民勸辦團練以期一  
律肅清惟九江之賊仍踞城中亟宜乘此聲威  
迅速攻剿現飭千總王樹英帶勇二百名由都  
昌赴潯候選縣丞項松慶等帶勇三百五十名  
由武甯前往隨同九江鎮總兵居隆阿等先行  
進攻又飭龍泉營都司馬占魁率領弁兵暨候

補知州陽秉鏞赴武邑籌辦防守及一切善後  
事宜臬司惲光宸督同吳錫光馳赴九江策應  
務期擒渠掃穴收復郡城與湖口舟師相爲犄  
角以扼江路奏入報

聞

十六日辛亥曾國藩塔齊布奏言臣等於克復興

國大治後定議先據半壁山富池口兩處臣塔

齊布於九月二十八日自興國拔營紮富池口  
羅澤南進紮半壁山本月初一日整隊進發羅  
澤南李續賓各帶兵勇行抵馬嶺坳距半壁山  
賊營二三里見該處孤峯峻峙俯瞰大江與田  
鎮諸山相雄長上紮大營一座小營四座空溝  
深丈餘闊三四丈不等引內湖之水環灌之溝  
內豎立礮臺木柵溝外密釘竹籤賊出接仗千

總何如海中石陣亡賊衆愈聚愈多兇猛異常  
我軍血戰三時之久羅澤南與知縣李杏春從  
左隄衝進李續賓從右隄衝進殲賊數十名賊  
衆大敗乘勝直逼賊營從木柵竹籬中踰溝而  
入彭三元分途截殺普承堯亦從右坳抄出圍  
住賊營各勇追至江岸賊急登舟我軍搶入舟  
中斃匪數千覆舟溺斃者亦不下千人浮屍蔽

江賊懼我軍飛渡自將浮橋拆斷我軍申刻收  
隊查明各勇陣亡者計十三人水軍自九月十  
九日戰勝後分紮渭源河兩岸二十九日營官  
白人虎等駕戰船十餘號往下游巡哨風平水  
溜將近蘄城該逆猝出船百餘號圍擊我軍小  
挫左營彭玉麟右營楊載福親往救應中營秦  
國祿等各率快蟹長龍等大船排轟而下哨官

任星元李陞元鮑超等傍南岸而行衝至蘄州  
以下之釣魚臺逆擊而上將賊船裹入中段該  
逆倉猝不能退轉紛紛棄船登岸我軍自上而  
下者攢礮以轟登岸之賊自下而上者縱火焚  
釣魚臺之賊船是日上犯之船悉數焚奪無得  
脫者計燒賊船約八十號奪獲賊船大小四十  
六號巨礮六十三尊白人虎因初時小挫復得



大勝憤極戀戰中槍殞命巡檢石熾然監生徐國本奮往助陣同時遇害賴大隊前往救應水軍復向岸轟擊始將陸賊擊退伏查該逆自武漢敗竄卽全數防守田家鎮蓋以南岸之大冶興國北岸之蘄州廣濟向爲衆賊淵藪而田鎮與半壁山又實爲天然之關隘故上游之賊併萃於此復自下游江皖糾集長髮悍賊來此拌

拒阻我東下之師現在鐵鎖尙牢繫江心兩岸  
賊衆尙近四萬計日內必須大戰數次臣等謀  
定後發斷不敢稍涉疏虞此次與該逆爭此關  
隘水陸幸均獲勝所有在事出力員弁兵勇懇  
恩酌量保獎白人虎集團倡義收復華容縣城茲又奮  
勇捐軀請與千總何如海巡檢石熾然監生徐  
國本仰懇

聖恩分別議卹奏入

上命軍機大臣傳諭楊需曾國藩塔齊布陳啟邁曰陸路官軍踏破半壁山賊巢雖已據守險隘而蘄州未復田鎮未破兩岸賊衆尙有四萬餘人儻江西戰船一時未能出湖湖北後路官軍相距又遠曾國藩等孤軍轉戰卽屢次獲勝亦尙可虞前此楊需奏請親督後隊會台下擊至今未見起程現在夏廷樾是否

到省武漢等處布置事宜當已漸次就緒北路桂明  
一軍總未會合非楊需親督後軍前往接應恐此路  
輒弱塔齊布以一路兼顧南北兩岸愈形支絀著楊  
需迅督官兵妥籌進剿爲會國藩等後路聲援下游  
九江一帶昨據陳啟邁奏已令趙如勝等各帶戰船  
堵截湖口豫備攻剿並飭居隆阿等先攻郡城儻該  
省戰船能出湖口溯流而上迎頭攔擊亦可爲會國

纂要卷一百一  
三  
藩等前路接應著卽妥籌聯絡不可各防各境致湖南官軍前後無援是爲至要

上諭內閣曰湖南水陸兩軍均獲大勝將半壁山賊巢踏毀我軍已據形勢著曾國藩塔齊布督飭各軍迅復蘄州將潯皖各境賊匪悉數埽除所有在事出力員弁兵勇著該侍郎等查明據實保奏營官白人虎著照守備陣亡例議卹千總何如海著照守備例議

卹巡檢石熾然著照例議卹監生徐國本著照從九品例議卹

同日托明阿陳金綬雷以誠奏言金陵尙有賊  
箚於本月初五日下駛二隻中藏大船環以木  
箚上立木城暗藏礮位由南岸大溜衝下臣托  
明阿飛催各師船上駛迎擊經陳世忠等儘力  
轟擊賊抵死抗拒追至儀徵沙漫洲將賊箚大

桅擊壞兩箠連合爲一適陳國泰由土橋督率  
遊擊陳世章等管駕紅單船暨已革儀徵縣知  
縣都榮森等帶領快船划船各水勇同時上駛  
總兵李志和等督率馬步官兵在北岸沙灘列  
隊以待我船駛至泗源溝江面值賊箠奔竄當  
卽會合上下夾擊天色已暝東風大作潮汎上  
湧賊箠猝遇逆風頂潮運動不靈兵勇水勇上

下攔截各船圍攻不息至初六日黎明將賊簞  
攻至對江李家溝口四面圍定槍礮齊發賊勢  
不支都檠森恐賊由南岸奔逃先派水勇過江  
在李家溝各要隘分投埋伏賴鎮海盧瑞祥首  
先攏近賊簞施放大礮將簞攻破轟斃落水之  
賊約數百名餘賊有鼻水竄上南岸奔逃者又  
經兵勇撿斬無遺當將賊簞二隻全行奪獲臣



托明阿因上游尙有賊箚防其下駛一面飛催  
水師迎截一面與臣陳金綬等仍分東西兩岸  
進攻瓜州臣雷以誠會同慧成於初六日督率  
師船進勦先攻北固山龍窩一帶開礮擊賊隄  
上土城紛紛倒塌燬其大黃旗望樓一座且攻  
且進駛至金山循環轟擊逆匪擾攘驚呼墜江  
者不計其數維時運河口瓜州小口兩處逆匪

分駕賊船二十餘隻趕來援救各艇分投開礮  
擊沈八隻賊匪淹死甚多餘賊收船入口死守  
礮隄旁有賊箄爲之掎角各艇兵勇奮力追勦  
疊開大礮將瓜州土城賊臺擊塌一處並將大  
箄上敵樓一座登時轟塌復擊毀沿江賊隄數  
處申刻收隊查點兵勇受傷無多實爲江上出  
色之戰奏入

上命軍機大臣傳諭托明阿陳金綬雷以誠曰水師攻  
剿賊彝賊船均獲大勝可見賊衆雖聯爲一氣我兵  
果能無分南北協力環攻該逆卽有應接不暇之勢  
若乘此機會上下夾擊成功更易該大臣等惟當併  
力攻剿瓜州或用聲東擊西之計先將金山奪回去  
其犄角卽可扼截鎮江斷其應援何得任令該逆堅  
匿不出不思力圖進攻其浦口洲地賊營負嵎日久

陸路既有武慶獨當一面水師復有李德麟等艇船若不嚴飭該總兵等實力勦辦仍前遷延貽誤托明阿亦斷難辭咎現在上游師船節節下偏皖江賊衆勢必分赴下游卽金陵大股亦必亟圖旁竄江面白浦口以下尤應嚴密攔截以杜該逆奔突之路著托明阿迅卽攻克瓜州並飛飭武慶等疾擣浦口賊巢仍隨時與向榮會籌扼剿之策就近飭令余萬清圍

攻鎮城嚴防逆衆潛竄常蘇並與江北官軍聯絡聲  
勢互相策應

上諭內閣曰金陵水師兩日之間攻燬江面賊箄並江  
浦兵勇擊退上游賊船均獲大勝正當嚴密圍剿迅  
圖掃蕩該大臣等務卽督催水陸各路兵勇趕緊將  
瓜州浦口各賊營賊箄悉數攻燬淨盡毋再遷延致  
令乘間竄逸所有在事出力文武員弁兵勇及上次

協勦南岸逆匪各員弁均著該大臣等擇其尤爲出力者分別併案酌保候朕施恩

十八日

癸丑

吏部奏言遵議安徽甯池太廣道何

桂珍處分何桂珍帶勇馳赴廬江起程多日未據報到難保非有心逗留請照任意耽延降一級調用例降一級調用奏入

上諭曰安徽甯池太廣道何桂珍著照部議降一級調

用仍著暫留本任交和春等軍營差遣以觀後效